



Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 408 888; Fax: 033 408 881
E-mail: nasastranka@nasastranka.ba
Web: www.nasastranka.ba

Sanela Klarić

Zastupnica u Skupštini Kantona Sarajevo
Sarajevo, 16.02.2024.god.

Dostaviti:

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo
n/r Predsjedavajući g. Elvedin Okerić

Uputiti:

Vlada Kantona Sarajevo
Ministarstvo komunalne privrede, infrastrukture, prostornog uređenja, građenja i zaštite okoliša

PREDMET: ZASTUPNIČKA INICIJATIVA

Na osnovu člana 106. Poslovnika Skupštine Kantona Sarajevo ("Službene novine Kantona Sarajevo", broj 41/12, 15/13, 47/13, 47/15, 48/16, 9/20, 14/20 i 16/22), upućujem inicijativu Vladi i resornom ministarstvu **da hitno pristupi izradi nove Uredbe o uređivanju i održavanju zelenih i rekreativnih površina u Kantonu Sarajevo.**

OBRAZLOŽENJE:

Analizom važeće *Uredbe o uređivanju i održavanju zelenih i rekreativnih površina u Kantonu Sarajevo* (br. 02-05-17436-22/16 od 19.5.2016.), a poznavajući probleme realizacije hortikulturnih projekata na terenu u širem smislu izgradnje novih, uređenja zelenih površina koje ne iziskuje izdavanje dozvole za građenje, rekonstrukcije postojećih zelenih površina i održavanje postojećih zelenih površina, kao i potreba za uređenjem odnosa privatnih i javnih preduzeća koja se bave poslovima izgradnje novih, uređenja i održavanja postojećih zelenih površina na temelju Zakona o javno-privatnom partnerstvu ("Sl. novine Kantona Sarajevo", br. 43/2023) podnosi se inicijativa za izradu nove uredbe pod nazivom: ***Uredba o izgradnji, uređivanju i održavanju zelenih i rekreativnih površina u Kantonu Sarajevo.***

S obzirom da oblast izgradnje zelenih površina u skladu sa Zakonom o prostornom uređenju Kantona Sarajevo nije obuhvaćena ranijom Uredbom, ista se treba urediti u novoj uredbi, što je u nadležnosti Ministarstva komunalne privrede, infrastrukture, prostornog uređenja, građenja i zaštite okoliša. U aktuelnoj uredbi nije precizirano šta podrazumijeva izgradnja novih zelenih površina, te nije određena potreba za izradom projektne dokumentacije, nadzorom i prijemom radova. Ovaj aspekt se nužno mora regulisati u svrhu racionalizacije budžetiranja i održivosti novoizgrađenih zelenih površina. Oblast uređenja i održavanja zelenih površina također treba biti preciznije određena u smislu propisivanja normativa za svu zelenu infrastrukturu. Dok je detaljno uredbom uređen aspekt izgradnje i održavanja dječjih igrališta, postoji nesrazmjerno manje informacija o normativima za zelene površine kao što su na primjer zapremine za sadnju drveća, tehnike sadnje, propisane vrste drveća i grmlja u odnosu na raspoloživi prostor, normativi za podizanje zelenila u betonu i sl. Smatram da bi normativno uređenje izgradnje, uređenja i održavanja zelenih površina u Kantonu Sarajevo unaprijedilo

održivost i funkcionalnu ulogu zelene infrastrukture, te uticalo na racionalizaciju sredstava koja se u tu svrhu troše.

Prema važećoj Uredbi javna komunalna preduzeća su dužna da uz pomoć vlasnika zemljišta vode katastar i o tome redovno informišu javnost. S obzirom na promjene u prostoru koje utiču na promjene u stanju zelenih površina, Uredbi treba da prethodi detaljna kvantifikacija zelenih površina, kao i kategorizacija površina na privatne i javne, kako bi se jasno odvojile nadležnosti održavanja prostora i prenijela odgovornost za upravljanje vanjskim uređenjem. Ovakva inventarizacija bi bila od koristi svim opštinama. Na prostoru opština je nužno precizno odvojiti površine koje su u nadležnosti održavanja komunalnog preduzeća, u nadležnosti Grada Sarajevo, u nadležnosti općina, ili u određenoj privatnoj nadležnosti. Ažurno stanje površina nad kojima ima odgovornost javno komunalno preduzeće treba da bude javno dostupno u vidu web prostorne baze podataka, što je manjkavost važeće Uredbe. Katastar javnih zelenih površina u Kantonu Sarajevo je ključni resurs za održivo i odgovorno planiranje i upravljanje javnim zelenim površinama u KS i uređen je članom 5 ove Uredbe. Ažuriranje katastarskih podataka je obaveza vlasnika zelenih površina kao što su općine, grad i sl. Ažurni katastarski podaci su osnov za izradu plana izgradnje, uređenja i održavanja zelenih površina. Plan i program održavanja se na temelju člana 6 Uredbe usvaja jednom godišnje.

Nova uredba treba da odredi izradu višegodišnjih planova uređenja i održavanja što bi unaprijedilo rad komunalnih preduzeća, koji su opterećeni brojnim zahtjevima općina i građana. Višegodišnji plan i program bi odredili dinamiku izvođenja radova. Trenutno su prisutne brojne inicijative za sječu i uklanjanje suhih i bolesnih stabala i njihovu zamjenu novim. Precizne upute o načinu uređenja prostora trebaju biti projektovane od strane stručnjaka iz nadležnog komunalnog preduzeća. Plan i program održavanja javnih zelenih površina mora jasno i detaljno definisati lokacije, plansko/projektnu dokumentaciju, plan monitoringa radova i nadzora, mjere njege i održavanja, kao i plan i način redovnog izvještavanja uspješnosti radova. Plan i program se izrađuje u koordinaciji sa vlasnicima javnih zelenih površina. Nova Uredba treba da odražava politiku razvoja vlastite rasadničke proizvodnje, uz propisane normative kvaliteta sadnog materijala. Sadni materijal mora da pored zdravstvenog stanja zadovoljava standarde koje nalaže struka za dimenzije itd.

Postojeća „Uredba o uređivanju i održavanju javnih zelenih i rekreativnih površina u KS“ od ukupno 48 članova ima samo 8 članova koji se odnose na zelenilo, svi ostali članovi se odnosi na rekreativne površine, odnosno dječija igrališta, te stoga smatramo da je neophodno u što kraćem vremenskom periodu donijeti novu Uredbu u kojoj će zelene površine biti tretirane u istom obimu kao i dječija igrališta jer ovih površina ima u mnogo većem obimu i njima je neophodno posvetiti veliku pažnju posebno sada kada svjedočimo velikim klimatskim promjenama.

Pored svega navedenog, zbog rastućeg trenda unošenja rekvizita za rekreaciju i igru, podloga i predmeta za koje postoji sumnja da utiču na zagađenje prostora mikroplastikom i drugim štetnim materijama, Uredbu treba revidirati sa članovima o kvalitetu materijala koja se koriste za izgradnju dječjih igrališta i drugog kako bi se postigla sigurnost prilikom korištenja.

Prilikom izrade nove uredbe sugerišem da se pozovu stručnjaci iz Asocijacije pejzažnih arhitekata u BiH kako bi svojim znanjem i iskustvima pomogli da se nova uredba pripremi prema najboljim savremenim standardima važećih EU direktiva.

S poštovanjem,


Sanela Klarić